

JEMIS

Warage o Ayeet Jemis

1 ¹ Aneeta Jemis o keen gabaren o Joowo, ma keen gabaren o Manyi Yesu Kiristo. Kazaayun igeet dook bor o Joowo kidonji ween amoto ram azaanoneku loocok dook.

Tuwen been genyiz

² Dol o yaai tuwento, ma avunakuñ kaal ci acinanun, atalto labak. ³ Eeci agayu niiga piryakzet nici aroonj kicina tuwen unoon, ka kanyun igeet doyiz ci amenanu tuwente unoon. ⁴ Anycek zin tuwen nico kemeda kodok kak noko, ka izimnyai niiga kaale dook kokom gi ci akomnekuñ.

⁵ Ma anyak naatunoon eet ci akom genyiz o Joowo, abon ajin niini Jook ka kanyek noono genyiz, eeci Jooi anyek ol dook o ajin noono genyiz irkente onin. ⁶ Bar zin goon ma anarye eeti, abon ajin niini Jook tuwenta zinize codoi calañ ajer zoo. Eeci eeti ci ajer zoo naryiinta, abil niini kiyo maama o ayelyelan hooti liila o. ⁷ Ma eeti ci ajer zoo noko, abon aga akom niini gi ci ka kojowa naaten Manyi. ⁸ Eeci een noono zinzeeti ram, ma bakbak niini kaale ogin agoon dook.

Maatiz been arokzet

⁹ Ma eeti ci amaat ma atuwe, abon atalne niini naati adonji Jooi noono. ¹⁰⁻¹¹ Maje eeti ceen aroi ma atuwe, abona niini atalne naati abadaan Jooi noono ki looc. Eeci tiñeere arokzet adicai kiyo koroboli o goon ma aarane kor ci abur, araabjai katabaz gol, ma adaai o. Ma eeti ceen aroi yo nuun aliñliñ niini iinya dook, adicai tiñeere arokzet cine o kiyo goon koroboli o.

Alañ cinaan aku Joowa

¹² Atalne zin katin eeti ci ajak piryakzet, eeci ma amena niini amez kaal nicoko dook labak, ajowa tiñeere niini roget o abil been neen baal aterkedek Jooi ol o areez noono e. ¹³ Ma acina eet gi ci gerze, alañ abon naati ane ne, “Abacakan gi ci ger noko Jooi.” Eeci Jooi alañ acinnyai giye ci ger, ma alañ buk niini acina eet ci deer kutugu gi ci ger. ¹⁴ Bar zin goon acina eet co kaala o ziniz onin maany. ¹⁵ Mazin gerzitin ma ibil zinize ci eet ci deer, arita oñec. Bodo oñeci ma idikir, arita daayiz.

¹⁶ Dol o yaai kareezun, ma anyeku ol kalabtawun igeet. ¹⁷ Ma kaal o abon anyoneket ageet dook, avu tammu tadena naati baatinai o eenyca ii ki nyelok been monyony. Niinilya alye onin alañ ookci, bar abil kizi noono ele noko been neen. ¹⁸ Eñerawet zin niini ageet oowe onin doon kiziti dol cigin, ma eyeleyet ageet zoz ween didi, ka kiziti naaga abuunya kaale baal laadun eenyca niini loota e dook.

Iiñliñti zoz o aziiknanu

¹⁹⁻²⁰ Dol o yaai kareezun, iziikto di jurun. Abona goon eeti aziikne taman. Bar zin alañ abon naati ayuwoneke niini zoz barzinta kataman. Ma alañ abon naati aborni noñ, eeci bornet noñ ci eeto alañ anyek noono kutugu kaal o abon aroonket Jooi ageet. ²¹ Zin giye nico abon aaranu kaal o ger eel zinzeetine ugooc, ma abon buk uñnu niiga kaal o ger goon agoonu tup. Anycek eleeti ugooc dook Jook. Utuweec buk zoz o arekuñ niini zinzeeti ka korogozun igeet. ²² Ma olla alabanu eleeti naati aziiknu zoz o Joowo iini doon, ma bar alañ aliñliñnyu. ²³ Eeci ma azii eeti zoz o Joowo iini doon, ma alañ aliñliñ, atobo niini kibeeneet ci acin ele mandara. ²⁴ Ma agelem niini ele jurun zee mazi awo noko, ereyek bodo noono ele ona acin jurun e. ²⁵ Ma lotinowa o Joowo niigi azimnyai, ma zoga ol cabiinta. Mazin eeti ci agelem lotinok nicoko, ma amena niini azooni jurun calañ bar olla azii iini doon, amayuk Jooi noono kaale ogin agoon dook.

²⁶ Ma azi eeti ne, Een niini eet ci Joowo, ma bar alañ agam aat onin, alaba koca niini ele onin, ma buk koca tuwen cine o izi gi ci labak. ²⁷ Tuwen zin ween didi nume o Jook ween baatinai neen ce. Oowa rak abon katirit dol ween boyok kibeene naai o boi piryakzete uneen. Ma vurta abon kazooni naaga alye eleeti kaale o loocu ger.

Ma acelbezanu ol oogi

2 ¹ Dol o yaai tuwento, ma arumnyu tuwen o Manyi onai Yesu Kiristo ween Jook onai titiny kibeene zoz ci acelbezanu ol oogi. ² Karabonj inoko avunakuñ igeet ol raman ceenze unoon lotento. Eeti codoi aroi ci aborcek rumanee ci alina, ma anyak nyapokodec ceen warki aziita. Maje eeti ce amaat, ma aborcek rumanee ci zorzor. ³ Ma bar atitinyu eet ceen aroi o naati aneku noono ne, “Aavu lecere ci abon noko.” Maje eet ci amaat o aneku noono ne, “Akomin ineeet lecer ci aave. Bito bil niina jena naate, karabonj aave todowai naato.” ⁴ Ma agoonu noko, abacu koca niiga zoz nico giye ci apezu ol oogi naatunoon o, eeci agoonu niiga zoz nico baabaninte ci ger.

⁵ Dol o yaai tuwento kareezun, iziikto di jurun. Anjera Jooi ol o amaat loota njina ka kiziti niigi arok tuwenta. Buk baliin o Joowo aterkedek niini ol o areez noono ka kizi cineen. ⁶ Bar zin goon niiga apezu ol o amaat. Alañ een ol ween arok neen o goon agidun igeet, ma avoyun igeet rooni o? ⁷ Alañ een noogo ele neen o goon amomoz zaar o Yesu Kiristo o atuyu niiga?

⁸ Abona zin azuunu niiga lotinet o baliin o tammo ayeedi waragewe o Joowo azi ne, “Reez ol oogi kiyo areez ele unun o.” Ma agoonu didi noko, utuguzu koca niiga gi ci abon zoot. ⁹ Mazi bar apezu ol kaale o acinu anyak niigi eleetine ugeec, abacawu koca oñe. Ma buk koca apayekuñ lotinowa o Joowo igeet gerzitin. ¹⁰ Eeci ma yo nuun azooni eeti lotinok o Joowo dook, ma bar olla abac codoi naatineen, apawonek noono gerzitin ci abaci lotinok dook. ¹¹ Eeci lotinet o azi ne, “Ma adoma zoocmaz,” azi buk ne, “Ma amuny eet ci deer.” Bar zin ma da naan doma zoocmaz, maje da naaman amuny eet ci deer, abacu koca niina lotinok o Joowo dook. ¹² Ozoozit zin goon zoocok ci abon, ma buk abon abaaku baayiz ci ol o aga niigi apak tiñeere Jooi noogo lotinowe ogin ka kooget ageet. ¹³ Eeci ol o goon alañ awucnek noogo gonogja ogen, apak buk Jooi noogo tiñeere gerze calañ awucnek niigi noono. Maje ol o awucnek noogo gonogja ogen, awucnek buk katin niigi Jook, ma alañ apayek niini noogo gerzitin.

Tuwen been liŋliŋon

¹⁴ Dɔl o yaai tuwento, mayo bonat inoo, mā azi ɛeti ne, “Keen eet ci tuwento,” maje ŋaato akom kaal ci abon agoon? Koca ka tuwen cine noko arogoz nɔnɔ ku? ¹⁵⁻¹⁶ Inoko mā anyak gotonogu karabɔŋ een ŋoonogu calaŋ anyak rumane ci abon, ma alaŋ buk anyak dayiin ci abon, mazi alaŋ atiritu niiga nɔngɔ, ma bar ayeleku nɔngɔ ve ŋaati aneku ne, “Ŋaan amayukuŋ Jooi. Ɔɔɔ labak. Ŋaan ajowanu dayiin ki rumane,” bonat zin koca cunooŋ o inoo? ¹⁷ Mazin tuwen doon kɔkɔm liŋliŋon ci abon agoonu, adaai kɔkɔm keŋ.

¹⁸ Bar mā azi ɛeti oman ne, “Anyak ɛeti ce tuwen, maje naana kagoon kaal ci abon,” kanei koca naana Jemis nɔnɔ ne, “Akɔm laadun eet ci anyak tuwen ŋaati akomni kaal ci abon alinliŋ. Inoko zin karoŋ keyeleyuŋ naana igeet tuwen onan kaale ogan kagoon.” ¹⁹ Ŋɛdet aga niina adoi Jooi tɔr. Ma gi nici abon ɔrɔɔt ɛɛ. Bar zin yo nuun een miniŋ o Loryento aga buk niigi adoye Jooi tɔr, ma aŋole niigi nɔnɔ ɔrɔɔt ɛɛ. ²⁰ Ineet aliyai nico. Nyan di keyeleyin gi o ɛene tuwen doon, gi ci labak. ²¹ Aga niina jijitina Ibrayim baale ajowa niini bonat ŋume o Joowo liŋliŋonte onin abon giye baal aziikni niini Jook, ma arɔŋ kook kataabi nɔnɔ logote onin kazi Aizak e. ²² Alaŋ aga niina gi nico? Tuwen o Ibrayim ɔrkɔr kibeen liŋliŋon onin abon, ma liŋliŋonti onine anyek tuwen onin kɔdɔk kak. ²³ Didi zin aleema waragewi o Joowo zɔzɔ o ane ne, “Atu Ibrayim Jook, ma tuwente onin anyek Jooi nɔnɔ kizi eet ci abon.” Makacin waanice otowe Ibrayim kizi laŋoti Joowo. ²⁴ Cin zin di, anyek Jooi eet kobona kaale ogin agoon buk, alaŋ een tuwenta doon.

²⁵ Atobɔ zin buk zɔzɔ nici kibeen zɔzɔ ci ŋaa o kazi Reyab baal een waanɔyai e. Anyek baale Jooi nɔnɔ bonat kaale ogin abon agoon, eeci atirit niini waanice ɔl ween roote, ma arɔɔt niini nɔngɔ, ma anyek kiniyit gole oman. ²⁶ Zin kiyo gɔon ɛɛ mā akoma vɔŋiz adaai o, buk tuwen doon kɔkɔm liŋliŋon ci abon, adaai.

Uzuuti aat

3 ¹ Dɔl o yaai tuwento, má anyeku ɔl ci meel ŋaatunooŋ kiziti ɔl ci demziinto, eeci agayu niiga naaga o kademzeka ɔl zɔzɔ o Joowo, appe tiŋeere rooni cinaaŋ kujuk ɔl dook. ² Naaga dook kabaca kaal. Ma ɛeti ci ŋaan kabaca gi ci ger aata, niini koca eet ci abon ɔrɔɔt, ma anim kozooti ɛɛ onin kaale dook. ³ Gɔon mā karɔŋ naaga taŋ ci tiir ka kizi gonon, kabɔr oŋec, ma kareke ziiit ka kiyitek ŋinti olla te karɔŋ naaga kooti. ⁴ Icinit di buk kavool o liilu adikir. Appe niini ɔrɔɔt ɛɛ, ma anim ɛeti ci wolinto o kokonyek nɔnɔ ŋinti olla te arɔŋ niini kooyi o keete ci miliny ter. ⁵ Abil zin buk aati cinai miliny ter noko nɔkɔ. Miliny niini ter, ma bar anyek eet kuduwa kaal ci meel ɔrɔɔt ɛɛ ci abɔlɔli.

Icinit di buk zari o gɔon appe ɔrɔɔt, ma bar atooz toronyoc ci miliny ter o. ⁶ Abil zin buk aati kiyo goo o. Niini gi ci ger ɔrɔɔt ɛɛ eleetine cigaac noko, ma anyaak niini ɛɛ dook gerzitin. Ma agerezan baayiz o eet o deer dook. Ma gerzitin cine noko aku Loryente o tiŋeere ajukonek goo o abil been neen. ⁷ Anim ɛeti ci deer kabal kelek o too ki kibaali been kuluk dook kiziti gonone labak. ⁸ Bar zin akom eet ci anim kanyek aat kizi gonon, eeci gerze niini ɔrɔɔt kiyo torel o, ma alaŋ kanim kuzuuti. ⁹ Ma aate nico kanaat naaga Manyi ween baatinai. Bodo aate nico ɛɛ kator ɔl o ɛenya Jooi kizi riritɔn onin. ¹⁰ Ma aate nico ɛɛ katorye naaga, ma bodo kanaat Jook. Dɔl o yaai tuwento, alaŋ abon ŋaati kagɔni nɔkɔ. ¹¹ Inoko gɔon maama ci abon been maam ci amokcar ariiya valacece codoi? ¹² Dɔl o yaai tuwento, inoko gɔon keet ceen moneec abiirna kebere ci kiŋiroco? Inoko gɔon buk karadaci abiirna kebere ci moneeco? Akom kina! Zin buk valaceci ci maam ci amokcar alaŋ anyaa maam ci abon.

Genyiz o aku Joowa

¹³ Mā anyak ŋaatunooŋ eet ci ageny aga kaal, abon ayelza niini genyiz cino baayize ci abon, kibeen kaale ci abon agoon, kɔkɔma bɔlɔlɔn. ¹⁴ Bar mazi anyaku niiga madkɔn, ki bolŋac, been zinzeeti appinzet, má adooŋnyu eleeti aziyu ne, Anyaku genyiz. ¹⁵ Eeci genyizi nicini alaŋ een genyiz ci aku tamma, bar genyiz o loocu ger aku Loryenta. ¹⁶ Ma vitenane o amadkɔn ɔl, ma anyayi zinzeeti appinzet, anyak buk yawyawitin been kaalyan o ger dook. ¹⁷ Bar zin ɔl o anyak genyiz o aku tamma, anyak niigi zinzeetine ugeec vooritin, ki ganɔn, ki ɛezet, ki zinzeeti laliz, ki zinzeeti bonat ci atirti ɔl, ki zinzeeti dowiin, been zinzeeti ci awawa. ¹⁸ Mazin bonati aku ole o gɔon aganziz gɔnɔgi.

Má areezu kaal o loocu

4 ¹ Mayo gɔon daŋon ki yɔwɔn avunakuŋ igeet ŋaadaŋ? Kaal nicigi dook avunakuŋ o, eeci uukonu niiga ki zinzeeti arooŋnyu utuguzi kaal ci ger. ² Ma arooŋnyu kaal ci arooŋnyu, ma bar alaŋ ajowanu, arooŋnyu uruyit ɔl ci anyak kaal nicoko o kadaayitɔ. Aŋuuweku zinzeeti kaal ci arooŋnyu, mazi bar alaŋ ajowanu, adaŋonu zɛɛ makacin oyoktowu. Alaŋ zin ajowanu kaal ci arooŋnyu o, eeci niiga alaŋ ajinu Jook. ³ Bodo mā ajinu Jook kaal, alaŋ anyuŋ o, eeci ajinu niiga nɔnɔ kaal ci ka utuguzi kaal ci ger. ⁴ Igeet ɔl ci areecanu, ma akomnuŋ tuwen coko. Alaŋ niiga agayu ɛeti ci areez kaal o loocu, niini miroi ci Joowo o? ⁵ Mayo aniyu ne, “Avɔlɔŋ waragewi o Joowo zɔzɔ o azi ne, Areket Jooi Vɔŋiz onin zinzeeti ogaac ka naaga kereezit nɔnɔ doon?” ⁶ Bar zin Jooi anyet ageet dɔyiz ci ka kalamti naaga kaal o ger kiyo azi warage o Joowo ne, “Iinane Jooi ɔl o adɔŋ eleeti dak, ma bar adɔŋ ɔl o celbez o.”

⁷ Anycek zin niiga eleeti Jook. Iiciktɔ been Loryen. Ŋaan adɔkɔny niini ŋaatunooŋ. ⁸ Ojooŋozit Jook ka buk niini koŋoŋozuŋ igeet. Ma niiga ɔl o oŋenu, otoŋit oŋe. Niiga ɔl ween zinzeeti ram, anycek zinzeeti kodoye.

⁹ Inonit oŋe ugooc, ma abon aluyu. Anycek rari unooŋ kizi luwa. Anycek buk talniin unooŋ kizi culum. ¹⁰ Ecelbezanit eleeti ŋume o Joowo, ka kodoŋuŋ niini igeet.

Má apayeku gotonogu gerzitin

¹¹ Dɔl o yaai tuwento, má aŋomtonu, eeci ɛeti ci aŋomɔt gɔtɔni, ma apayek nɔnɔ gerzitin, aŋomɔt koca niini, ma apayek gerzitin lotinok o Joowo. Mazi apayeku lotinok o Joowo zɔzɔ ci ger, alaŋaan zin koca niiga eeginu ɔl ci azoonu lotinok o Joowo, bar izitu ɔl ci apayeku lotinok gerzitin. ¹² Jook zin doon o anyek ɔl lotinok, ma buk apak ɔl niini doon. Anyak niini dɔyiz ci arogzi ɔl, ma aruyi ɔl kadaayitɔ oowe onin doon. Mazin niina ineet ŋeneen ci ka pak ɔl oogi o?

Má abololu

¹³ Iziikto di niiga ol o aziyu ne, “Waanico karabon een tiijeere kaluugia kavoya looce oman ka koota kaavtiya njinaante irkit codoi, ka kilinjliqtawa kaal ci meel.” ¹⁴ Alañ agayu niiga gi ci ka kakatai tiijeere. Ma rogeti cunoonj o abil kiyo kidoyi o goon abunja looc, ma njintimiliny noko bar izi dim o. ¹⁵ Abon zin waan niiga aziyu ne, “Mā njaan te anyet Jooi kaaltawa, kavō kagoona kaal coko kibeene ceke.” ¹⁶ Bar zin inoko niiga adonnyu eleeti, ma abololu. Mazin bololoni nici gerze. ¹⁷ Mazin eeti ci aga gi ci abon, ma bar oonj loror noko ci alañ agoon, abaca niini onje giye nico.

Demziin ci akati ol ween arok

5 ¹ Iziikto di niiga ol ween arok. Abon aluyu piryakzete ci tiijeere akunakunj igeet neke. ² Arokzet cunoonj noko tiijeere aboyi lai, ma adak buk rumane cugooc noko zizaaca lai. ³ Buk warki ugooc dook kibeene zurtenen adak tiijeere todowa koboye lai. Ma gi nici ayelekuñ igeet bowinet o buk tiijeere abowinu niiga. Eeci arokzet nici atobo ki goo ci avaat eet ci deer. Inoko zin niiga alinjliñnyu arokzet ka ojokta gi nico iinyaye ci atorneke e. ⁴ Njaan anycek ol o alinjliñ maneene ugooc voyit o linjliñ oneeñ, makacin utuluzo. Iziiwun zin Jooi luwa uneeñ aronji niigi voyit o linjliñ oneeñ. ⁵ Eeginu niiga arok looce nico oroot ele, ma olla agoonu kaal ci aroonnyu niiga. Mazin arokzet cunoonj noko anyunj idiiyit, ka eeltek iiten o ka adaakti kiyo tanj o adii abilnek iiten ci ka kotodonji o. ⁶ Apayeku goon niiga ol gerzitin, ma aruku noogo kadaayito gaga noko kokom gi ci abaca, eeci akom noogo dayiz ci ka keeltai eleeti njaatunoonj.

Zinzeeti laliz

⁷ Dol o yaai tuwento, ereyo zinzeetine ci alal zee ma abada Manyi kiyo eeti o eevyi goon are tammu tiilez. Ma buk are mana biirez zinize ci alal o. ⁸ Abona zin buk niiga arewenu zinzeetine ci alal. Agamit zinzeeti kodoyit, eeci iiteni o ka kabadai Manyi izi ajon.

⁹ Dol o yaai tuwento, mā arowonu cocobon, gerze njaan apayekunj Jooi igeet gerzitin, eeci izi Jooi ajon ka kiiya kapak kaal o loocu. ¹⁰ Dol o yaai tuwento, aada zoz o nyakananet baal goon azoz zaare o Joowo e. Apirna baale niigi oroot, ma bar amez niigi piryakzet labak. Abona zin buk niiga ayayizu noogo. ¹¹ Kaga zin naaga baale niigi ol ci atalne, eeci waanice niigi amena amez piryakzet labak. Iziiktu niiga ziniz laliz o eet o kazi Job. Ma agayu niiga waanice iya bodo itirit Jooi noono vorta piryakzete onin. Eeci awucnek Jook ol ci deer, ma itirit niini noogo.

¹² Dol o yaai tuwento, mā atoonu tammu taden, karabon een todo, karabon een kaal oogi loota njina been neen. Bar olla iziti ne, li, karabon aziyu ne, Akom, ka calañ apawonekunj igeet gerzitin.

Njaryiin tuwenta

¹³ Mā anyak eet ci apirna njaatunoonj, abon ajin Jook. Mā anyak eet ci atalne, abon aben beniinok o Joowo. ¹⁴ Mā anyak eet ci amoor, abon awa alaat o bor o Joowo ka kivita kijintek niigi noono Jook, ma avuut noono maala zaare o Manyi. ¹⁵ Ma njaryiin o njaryin ol tuwenta, anyek eet ci amoor korok. Zin Manyi neen o ka korogoz noono, ma buk aara niini njaatin onje ogin abaca.

¹⁶ Abon zin goon aboronu onje ugooc, ma njaryoneku eleeti ugoocok niiga maany, ka orogit. Ma njaryiin ci eet ci abon anyak dayiz ci agoonine gi o ajin niini. ¹⁷ Baale buk Ilija eet ci deer kiyo naaga noko. Ma njarye waanice niini oroot ele ka calañ atil tammu. Ma didi uluz tammu waanice irkitok iyyu ki nyelowe torxonom. ¹⁸ Ma vorta bodo njarye niini ka kitiil tammu. Makacin didi bodo itiiil tammu, ma aliz looci.

¹⁹ Dol o yaai tuwento, mā alam njaatunoonj eet ci abac gol o Joowo een didi, abon eeti oman njaatunoonj ako abadaan noono bodo. ²⁰ Abona zin agayu niiga eeti ci ako abadaan gon ci ook gole ci ger o, orogoz niini noono daayiza, ma anyek buk onje ogin meelik kaaryai njaatin.